

■ COLUMNA

Tgi lascha encrescher per il dodo?

DA SILVANA DERUNGS,
SURAUA/CUIRA

Essas Vus segir che l'existenza da l'umanitad As interessescha vairamain, era sche Vus e tuts Voss enconuschents n'essas betg pli?» Quai è l'emprima dumonda en il «Fragebogen» da Max Frisch. Tgi che l'affirmescha, duai inditgar ils motivs persuenter. – Forsa perquai che ina existencia è meglier che nagina existencia? Pertge ha lura l'existenza da l'uman dapli valor che p. ex. quella dal dodo (in utschè che l'uman ha extirpà avant passa 300 onns curt suenter sia scuverta)? Hai da far insatge cun in tschert Dieu? U cun il pais dal tscharvè?...

Fissi egoistic da dir «L'uman a lunga vista na m'interessescha betg.»? Pertge esser ipocrit e far sco sche m'interessass quai che na ma pertutga betg? E lura anc en l'avegnir! Guardain mo ina giada sin oz! N'èsi betg uschia che gnanc ils destins da generaziuns preschentans pon tutgar? Cler: Catastrofas acutas sco ils terratrembels gist succedids ans pon mumentar ad acziuns da solidaritad. Ma tge èsi cun catastrofas che vegnan plaun e dascus, ma che n'èn tuttavia betg main dramaticas? Quant fitg ans accurschain nus dals milliuns fugitivs da l'ambient che ston bandunar lur dachasa perquai



che lur funs è daventà desert? U perquai che l'unica funtauna dad aua è sut la controlla dad ina partida? Malgrà la globalisaziun èn l'India u l'Africa lunsch davent da nus. – Ma tge, la finala n'ans empudain nus era betg che nus essan natschids qua e betg al Ganges u sper il Lai da Tschad, navaira?

Nus pudain ans svolver vi e nà sco quai che nus vulain: Ina buna vita umana resta colliada ad in ambient intact che porscha las resursas fundamentalas. Ils problems da las midadas climaticas èn enconuschents – pli u main. Ed omnipreschents – talmain ch'ìls blers èn unfis dad els. Tge porti era da far las acziuns à la «mintgin duai cumenzar tar sasez», sche quels che han enta maun il regulatur na vulan betg far in pass decisiv e sa fidan dad ina speranza intscherta enstagl dad avoir uss la responsabladad? Sche las tulpanas da l'Olanda èn sa

transformadas en 100 onns en anemonas d'aua u sch'ìl rustg brin na sigliotta la primavera betg pli davant noss autos, na pensa probablmain nagin co igl era pli baud. U lascha forsà insatgi encrescher per il dodo?

Vegn ina giada insatgi a laschar encrescher per l'uman? – Pertge duai jau lura insumma far insatge, sche l'umanitad para tuttina dad esser sin via da far suicidi collectiv. (Quest maletg dramatic n'è betg da mai, mabain dal filosof tudestg Hans Jonas che l'ha duvrà gia avant 30 onns.) Il tragic è mo: Quels suicidaris tiran cun els natira ed umans innocents. Ma la finala: La catastrofa vesain mo nus umans; la natira na l'enconuscha betg, ella sa tira schon insaco or da la buglia. E sche nus n'essan betg pli – tgi interesseschi lura co ella guarda or?

Ma insaco na ma lascha quai tuttina nagin ruaus. Ed uschia – era sche jau na ves tuttina mai il grip da curals che mes daners han salvà – paj jau vinavant las contribuziuns a WWF e cumpagnia e pens «Quels fan schon la lavur a favur da natira ed uman». Las confermas da donaziun per la decleraziun da taglia èn mias brevs da perdun che ma duain segirar in plaz en il parvis. Forsa ch'ìl dodo è era là.